

四庫全書

經部

欽定四庫全書

易像鈔卷十六

明 胡居仁 撰

書

答陳蒙山先生

易義精微一良可了華嚴一部周子非欺我也如章言  
已日解言甲拆天地生成消息明炳指掌一陽生子中  
坎中爻也一陰生午中離中爻也離言已坎爲戊可以  
三隅反矣離中一陰遇兌而言已言草坎中一陽遇震

而爲戊爲解亦可以三隅反矣造化坎陽遇震而解離陰遇兌而革此等消息時時呈露於吾前呼之吸之生之成之無一息不與天地通一呼爲解爲生爲出吾出而有生一吸爲革爲成爲入吾入而有死謂生不知所以來死不知所以往求之釋佛死生之超而不求吾孔易生死之盡得乎吾儒生死消息是陽是戊而遇春令之至未有不解而生者是陰是已而遇秋令之至未有不革而成者又種子是戊無所不生生固生死亦生種

子是已無所不殺死固殺生亦殺是故種下生根生氣  
感未有不生者種下殺根殺氣感未有不殺者殺氣不  
能殺生根生氣不能生殺根然則造化何能生死人亦  
人自生自死耳生死事釋氏說以爲驚天動地之大而  
吾聖人明白指示於易則易知之易也有如此不審吾  
翁其以爲何如

答顧季時

天地定位四句陰陽老少對待成列自是定體至出震

章盡易其位乃爲相錯竊疑天地定位六子行乎其中如天地之上爻相錯便是山澤通氣天地之下爻相錯便是雷風相薄天地之中爻相錯便是水火不相射有六子便已盡易天地之位似不待至出震章然後爲盡易其位天定位於上而錯於下交地定位於下而錯於上交便已不相順而相逆故以言其逆乾逆坤爲震動爲坎陷爲艮止坤逆乾爲巽入爲離麗爲兌說雷動風散雨潤日暄艮止兌說莫非乾爲之君坤爲之藏錯者

未嘗不定逆者原成其順單就八卦言之已是相錯已都爲逆數已是一部全易了也一

陰陽互根陽則生陰陰則生陽自陰儀中生者先陽後陰自陽儀中生者先陰後陽竊疑先後之說亦微未融易曰一陰一陽之謂道一言道盡逆數大義以八卦次序橫圖玩之一陰一陽以六十四卦方圖玩之一陰一陽太極生兩儀一陰一陽兩生四一陰一陽四生八一陰一陽一齊都到無分先後若欲判兩儀而言所生之

始謂陰儀所生始於坤陽儀所生始於震可如此者謂之地逢雷由坤逆而至乾亦逆則俱逆之說也謂陽儀所生始於乾陰儀所生始於巽可如此者謂之乾遇巽由乾順而至坤亦順則俱順之說也二

顏子庶幾謂爲後天之學以知在有後爲順數爲發然後禁竊詳夫子稱顏子語意有不善未嘗不知謂其更無不知之時也分明是嘗知朱子亦稱克己復禮爲乾道言乾則先知矣聖人知幾顏子庶幾只未達一間無

先後截然之判夫復以自知聖人以復之初爻許顏子  
透底真陽震動瑩為真明炳為先幾無論三千即七十  
子亦莫能與顏子之知果在有不善之先耶抑在有不  
善之後耶其發然後禁者耶抑禁於未發者耶到念頭  
上校勘家數與未嘗不知公案相去千里顏子嘗知故  
不貳過吾輩嘗不知是以貳過三過以至於千過萬過  
通身坐在過中度日子猶不覺其為過而陷於長傲遂  
非之歸者多矣三



先天後天無二圖亦無二說易有太極其先天乎兩儀  
四象八卦六十四卦三百八十四爻或圓而圖之或方  
而圖之其皆後天影樣乎天地山澤雷風水火八物皆  
帝皆神俱後太極而為言依舊要完全還他一太極先  
乎由是後乎由是往乎由是來乎由是有先無後有往  
無來乾坤毀人類滅矣此易所以作故凡圖之方圓橫  
直都是後天只有一箇太極便是先天先天不可圖人  
生而靜以上不可說四

性純乎理太極也得之心雜乎氣陰陽也亦微要分別  
陽儀道心也一無雜陰儀人心也折而為二則有雜矣  
聖人懼人一而二教人二而一故曰窮理盡性以至於  
命其在孟子亦曰仁義禮智根於心孔孟教人只要心  
上尋得根出逆流上水尋出源頭來蓋人自形生神發  
以後都是順流水愈趨愈下易有三百八十四爻爻爻  
都撐逆水船一篙不得放緩故以逆而成順可以順而  
成逆又別論五

雷出地上曰陽分陰雷在地中曰陰含陽只是要主張  
知幾庶幾之所以異故有此見解第平平理會聖人言  
語其曰雷出地奮曰雷在地中俱提掇一箇雷字為頭  
面不曰雷出地上又必曰雷出地奮此處還分得不成  
其為豫矣姑為俚解聖人雷出而地奮故無不善顏子  
雷欲出而地未奮故有不善雷孔顏之所同地孔顏之  
微異幾孔顏之所同曰知而神曰殆而庶孔顏之微異  
豫固孔之樂在其中復亦顏之不改其樂知幾者道心

純然十分庶幾者道心已是九分九釐九毫九絲第有一絲髮未化之人心故言其殆而庶耳六

先天之學至矣以顏子猶然庶幾夫執塗之人而求其初人人先天也而況顏子謂其非先天之學可乎不以先天為學日用間尚別有第一親切工夫否七

賢如堯夫尚且學先天而失之語殊未穩程子謂其根本不帖帖地夫根本太極也先天也不帖帖地此豈未達一間而已正謂其未能踏實先天脚跟遂有不點地

去處耳惡有學先天而反失之之理八

認心為性認人心為道心夫能認心是猶知有心者也  
今有一種議論謂六經無心學連心都不認賬矣夫易  
有太極是生兩儀兩儀人合而為心者也陽儀曰乾乾  
以易知陰儀曰坤坤以簡能言知則從乾上論矣言能  
則從坤上論矣從乾論則道心矣從坤論則人心矣道  
心一人心拆而二不拆為二而合為一人心即道心道  
心即性即太極也心與性竟究有兩否乎人心道心竟

究有兩否乎是故太極生兩儀心有兩兩儀一太極心  
惟一道心無兩人心有兩兩原是一人多拆而二之父  
子二則無親君臣二則無義夫婦二則無別長幼二則  
無序朋友二則無信推之萬事萬物莫不皆然故二之  
不可不求一坤之不可不承乾也乾知大始是人家始  
初開頭一箇太祖公子子孫孫皆其一體所分認得太  
祖公的人其於宗支圖條條款款決然畫得分明決然  
不會混賬也九

兩儀未生以前自屬於來原不言往來往二字亦甚活  
如人端坐在家原不曾往何須說來聖人要人知來只  
為他一向往外喚他來家耳十

惟不拘拘於上下東西之往來而一以造化主宰乎其  
間則有交而不測其交此神之所以為妙云云竊疑八  
卦之外似無另有一箇造化主宰乎八卦之間只舉天  
地定位一句說謂天地非造化可乎謂定位非主宰可  
乎夫太極生兩儀太極便在兩儀中兩儀之外又去另

尋一箇太極為兩儀主宰以是為帝為神尚不能無疑  
或者天地定位章指示人心一箇太極全體出震章指  
示人心一箇出頭道路耳乾兌離震巽坎艮坤或方而  
順數之或圓而順數之自乾一順至坤從天墜到地上  
矣易逆數便要從地仍舊上天其在坤震之交乎堯根  
雷從地起言坤便該逆至巽言震便該逆至乾故以言  
其帝出蓋逆數之起當從此出非其易天地之位實乃  
定天地之所定而位天地之所位者也又曰齊巽一出



復一入一逆又一順自下而上為地逢雷自上而下為  
乾遇巽出入逆順截然不亂是之謂齊至于見離役坤  
說兌又齊巽的自然次序戰乾勞坎成艮又出震的自  
然次序謂不拘拘於上下往來誰能動得他一動也十一

與友人

昨辱賜教則已身承法門昭然受發蒙之益矣何幸如  
教旨蒙義一章敢以臆請山下出泉蒙人人有此山下  
初出之泉兄所謂渾是聖人胚胎是也雖則渾是聖人

胚胎却被陰柔氣質包裹了一包裹如一陽陷於二陰之中上面又止了一止故曰險而止蒙童蒙而能求我出乎險而不止去蒙而成聖童蒙而不求我止乎險而不出蒙日以蔽而去聖日以遠是故蒙之亨非以止以行也非以再三而失時以初筮而及時也及時慎行以窮山下之泉原以立天下之大本淵淵其淵取之左右逢其原行中之功時中之聖也能無亨乎蒙亨則聖蒙困則昧困然後昧蒙無味也亨之自我困之自我我求

求我皆非人也三軍可奪帥匹夫不可奪志志在我其應乎其不應乎可自筮也我蒙我亨我求我筮我學不厭而教不倦謂我不學而能教人謂我未能不厭而能不倦者無之故曰誠者非自成已而已所以成物也若但發人而不自發擊人而不自擊或不可與發擊直絕之於教外則天地有棄物聖人有絕人陽貨可見公山佛肸之欲往取瑟之歌予不屑之教誨何為乎於初筮告之義荒矣禮聞來學不聞往教來我而學所以教人

往人而教非以為學兄謂本末始終四字把定入道之  
樞此處落脚不愁不實夫養正謂之聖功謂把得樞定  
落得腳實也以道自重不至徃教告之有節施於可受  
而不強其所不受為時中其得為把得樞定落得腳實  
否耶喜怒哀樂之未發謂之中孔子聖之時山下之泉  
之所自出未發之中也十五志學孔子之時也求此筌  
此行此得此樞無不定而腳無不實聖功也惟孔子有  
之故曰時中之聖人也蒙蓋以時中示人入道之樞而

以初筮求我示人落腳實地矣幸惟批教乃紉包收茹  
納發我擊我之度

答于元時

來教屯有馬而無乾離有牛而無坤云云馬之取象原  
不單指乎乾屯之上坎下震皆馬象也又牛順物也但  
有巽順之德即成牛象无妄或繫之牛巽也離之畜牝  
牛巽也乾馬坤牛煞定取象聖人無是也一

來教比後受之以畜蠱後受之以臨復後受之以无妄

頤後受之以大過等處於義未連意亦不貫云云此在序卦傳中略備而宋王申子甚不取謂以一字相連其於卦義頗無交涉也合六十四卦以立人譬之合四肢百骸為一身今謂目後受之以鼻手後受之以足皮後受之以毛人其有不一團笑之乎當時聖人指點人不以百骸四肢全體備具為人身只以天地雷風水火山澤八物相摩相盪為人身如俯察而見水之行地則既指之曰此人道之比也仰觀而見風之行天則又指之

曰此人道之小畜矣觀山下之有風則曰此人道之蟲也觀澤上之有地則又曰此人道之臨矣天下無一處與我無相干天下無一處非我做學問處直是做得一箇天地之大方始成得一箇人道肢肢節節原無不相連止於逐肢逐節搜尋而不見吾身全體之大血脉原自無不貫通此非所以為易學也二

來教洗心藏密元妙未易形容云云心何洗密何藏世人皆籠統顛預而汎以為言耳聖人實指之曰以此此

者何著德也卦德也爻義也人知百骸四肢人身無一  
可缺漏不知六十四卦三百八十四爻人身尤無一可  
缺漏但有一缺漏則踈矣但無一缺漏則密矣日日易  
默成象語成爻得此者也心能洗者也密能藏者也有  
一日不易默不成象語不成爻失此者也心不洗者也  
密不藏者也此處著不得言語著不得訓解第故後之  
耳三

答陳曰仁



承問數往者順知來者逆易逆數也此本天地定位山  
澤通氣雷風相薄水火不相射八卦相錯而言後人訓  
解順逆多不得其義為脫了八卦相錯一語但據八卦  
次序之圖為說又或據六十四卦陳列之圖為說而曰  
自震至乾順也自巽至坤逆也是半順而半逆也或曰  
由乾至坤順也由坤至乾逆也是全順而全逆也全順  
全逆比之半順半逆其義差優然皆似據八卦圖次序  
陳列為說非據八卦相錯為說乃聖人所謂順逆則本

八卦相錯而言以乾坤六子論乾錯坤而有震坎艮坤錯乾而有巽離兌自乾錯坤而生三男順也合三男而成其為全乾逆也自坤錯乾而生三女順也合三女而成其為全坤逆也譬之父母生育男女有貨財分於男女順也男女奉養父母有貨財奉於父母逆也易逆數全是教人立人道為順易而逆難順多而逆少也以六十四卦論凡一卦必上下相錯而成十六卦如以乾為主而上錯下錯皆八卦順也上錯下錯之八卦無一不

以乾為主逆也餘七卦皆可例推矣舉要言之往水之流也來水之原也數往沿流之順也知來窮原之逆也由太極而陰陽五行數往之順也五行陰陽陰陽太極知來之逆也易曰形而上者謂之道形而下者謂之器聖人作易全是教人由形而下之器悟形而上之道人生斯世有順無逆但使順水船只管向下流曰流曰下必撐逆水篙方是向上流曰撐曰上凡皆往順來逆之義又如少而壯壯而老老而死是順彌高彌邵血氣有

衰之時志氣無懈之日令此七尺軀交得還天地是逆  
交得還天地如人到家為來交不得還天地如喪人如  
亡子客死於外為不來聖人重知來以易為逆數或如  
此

答友人

戰乎乾龍戰于野戰無兩義只是戰乎乾冠之以帝戰  
主在帝乾其戰之方也若坤上則稱龍戰不可稱戰龍  
又言戰于野亦異於戰乎乾帝似以八卦之主宰言如

儀象之太極龍似以六陰爻之主宰言乃坤之乾也戰乎乾曰陰陽相薄其義平戰于野曰陰疑于陽必戰其義軒輊陰陽相薄之戰陰陽不可相無如月令仲夏日長至曰陰陽爭陽將盡而陰來爭也仲冬日短至亦曰陰陽爭陰將盡而陽來爭也月令之所謂爭陰陽相薄之戰也陰疑于陽必戰又曰為其嫌于无陽故稱龍禮決嫌疑嫌疑之際君子不處此似以疑故必戰不使其有疑也以嫌故稱龍不使其有嫌也譬之極順之妻無

疑於夫何必戰不嫌於無夫何必稱夫坤極於上處窮之位疑於夫故必戰嫌於無夫故必稱夫必戰稱夫此似坤上終極於順之能事二不疑其所行至上之窮不能無疑疑故必戰也于野何曰坤德方戰稱龍不可以方拘皆野矣其血何曰聖人明言猶未離其類故稱血西南得朋乃與類行類不當離也東北喪朋乃終有慶類當離矣至上而猶未離何云得主何云承天時行以嫌于无陽故稱龍所以別嫌以未離其類故稱血所以

離喪朋類元黃何曰聖人明言天地之雜天元而地黃  
乾坤成列天地各正初未有雜其雜六爻相雜雜物撰  
德從元黃始也此乾坤以後入屯之象也屯曰剛柔始  
交而難生震為龍為元黃坎為血卦屯上又曰泣血其  
脉絡可見如此微獨屯嗣此六十二卦卦卦相雜物相  
雜故曰文皆元黃成文之象也一

乾不為首無非乾也六十四卦皆乾之全體皆以乾為  
首也坤上曰龍戰不必向乾卦索龍只坤之主宰自為

出頭便是乾便是龍坤極於上主宰出頭震動恐懼便是龍戰龍戰忠臣孝子之極致若說戰龍便是亂臣賊子弑逆之大惡二

行陷用陷皆坎德皆陷功行險不失其信能陷者也君子也行險僥倖為陷者也小人也虞廷危人心以為陷也微道心以能陷也孔子以相近言性先天首乾純乎理純无陷也以相遠言習後天首坎兼乎氣質兼有陷也形既生陷既成矣欲不為陷定須能陷為陷終身燕



溺之小人能陷終身憂勞之君子一息尚存不容少懈  
一息不勞不得一息無功不得故曰行有尚故曰勞乎  
坎以其用得功勞多故坎為勞卦以其為刺血見血學  
問故坎又為血卦

天險不可升只是不可升便喚做天險天何險之有地  
險山川丘陵只是山川丘陵高卑界限儼然截然便喚  
做地險地何險之有王公所以守國者此士庶所以守  
身可知是為險之時用之大時時有此險用是為坎之

成德是為習與性成聖賢同歸

坎二曰有險方在能陷坎五曰既平陷已成功既平盡  
平也即險為易矣故君子未嘗不行險不用險只喚做  
居易水流不盈此人人固有之坎體纔盈便橫流汎濫  
懷山襄陵甚之滔天五爻曰不盈象曰未大坎五謂之  
大水可以中故不侈然自大未大明其所以不盈詩曰  
民之靡盈誰夙知而莫成二求小得小亦原來坎體故  
詩之咏文王曰小心翼翼只怕失故言求言得四約亦

然子曰以約失之者鮮前賢言心欲小又言大其心則能體天下之物小心坎一原後天之始事大心乾一返先天之終事小心入手工夫大心了手能事惟乾為可大乾豈人之所易言哉夫乾天下之至健也德行恒易以知險坎二五乾體之知險者也餘非所望矣惟四在下坎之上可望其能知故繫之自牖而明其終无咎終義繫於自牖後應有要終能事在此亦盡心而後可望知性知天知天而後天可與事命可與立說

民無信不立無信雖生無以自立如手足癱瘓如大筋  
舒緩小筋弛長通身雖有脉絡不相維繫如何立得起  
惟行險不失其信脉絡纔聯屬而心得亨血脉纔流貫  
而行有尚心與行皆以亨致亨以坎致三

震之億喪貝義亦與坤之喪朋同蓋以二陰乘初剛則  
喪矣竊疑陰虛陽實故噬嗑之五以陰居陽故言得小  
畜之五以陽爻故言富乃家人之六四以陰亦曰富謂  
四能以陰虛而成一家之陽實象故明曰順在位也坤

於朋西南利得東北利喪此有喪有得喪不宜得得不  
宜喪者若震二於貝方言喪旋言得此即喪即得喪其  
所得得其所喪者朋乃同類貝似即已義已不同又坤  
以往言得喪主不在坤震以來言得喪主自在震義更  
不同震二爻柔體剛又最邇初故來與初同震是夜半  
雷聲天理迅發首出端倪故於人稱貝猶諺言寶貝之  
貝無盡藏之藏其言喪義不係於來而係於厲來厲應  
是不足以掩耳迅雷如人有鉅萬金玉寶貝猝逢疾雷一

震這所有若盡失之連這身子霎時間也如在九霄雲  
裡少間依然故吾原無喪也二有得喪之間以初震之  
危厲五無得喪之間直言無喪有事以洊震之危厲險  
阻艱難二初嘗五備嘗故分量不同如此貝海介蟲羸  
之太者離為羸為龜頤象離故曰靈龜損益中爻亦象  
離故皆曰十朋之龜震中爻亦有離象故曰貝易者象  
也並不懸空鑿空說此所以有意味如離上折首以四  
突獲匪其醜以三吳四何嘗突三何嘗吳兩離相重中

爻雜撰遂生突爻之象出來昨所云假病者如此去其  
雜撰之病還其本體之明此離上之所謂征以正邦也  
至於陽貴无首陰貴喪朋微近於執用九見羣龍无首  
吉又曰用九天德不可為首羣龍非无首見其无首也  
天德非无首不可為首也似還要體貼見字與不可為  
字若陰而單貴喪朋西南利得云何西南利得與東北  
利喪此似兩股板門文章也或躍在淵而曰或之者疑  
之也似與居之不疑疑義相反不疑自以為是非龍并

非躍矣又如卦有貞悔上而无悔非龍并非亢矣四

乾剛坤柔一而二二而一息息相推相盪交流竝運方  
成列方不毀屯於二四上俱言乘馬便其義馬无乘牡  
先而牝不後牝承而牡無倡匪孤陽即孤陰匪偏陽即  
偏陰譬之草木孚甲且無日天喬復何有

震坎相重之卦動免乎險曰解動乎險中曰屯屯二四  
上之班視坦途皆荆棘而况非坦途視軌道皆險阻而  
况其險阻當凜朽索之懼常懷要駕之虞長慮却顧震



動疎懼時刻是箇盤桓居貞之心此所以為險中之動  
屯之四柔爻三乘馬一即鹿何以異曰二四上爻位俱  
正三則異矣以故二四上象在閑而三則在野二四上  
象就駕而三則野馳无虞无所主掌更見其在野而難  
即之象又轉過念來入于林中无非躁動妄動之象幾  
而舍亦便有班如之能事則以終為震體其究為健之  
故五

不遠復无祗悔元吉向來但作不貳過解尊教謂亦即

不遷怒解最旨聞之先輩云不遷怒主人常定不貳  
過主人常一故總在心體上論亦即程明道定性書之  
戒怒乎情易發難制莫如怒或一時有怒必戒必懲以  
期於平竝無有怒做得主之時而此心隨之以移動曰  
不遷知過難改過尤難或一時有過必喜聞必樂受必  
速改以復於無過竝無有過做得主之時而此心反為  
之副貳曰不貳易曰有不善未嘗不知知之未嘗復行  
政如此過為不善不待言七情中惟怒易發難制并謂

之不善亦不可未嘗不知言常知主人常精常明常定  
常一有怒霎時平得如何遷有過當下改得如何貳不  
遷不貳斯謂之不遠復纔遷則遠纔貳則遠無以語於  
常知之復體矣復初地中雷厲之微體也雷厲之體直  
截迅疾故有怒與過當下便能消融克治得真如紅爐  
點雪點脚不住若使爐不甚紅或如雪片投來但須臾  
不消化便湏臾作滯礙但頃刻不消化便頃刻作滯礙  
此之為遷為貳已多若不學雖學不好者流乃知以雪

塊滅紅爐者耳遷貳字樣怎生便說得做到不遷不貳  
惟顏子地位纔說得故曰好學

人有怒廓然便能平霽得人有過翻然便能改圖得此  
非自知主人十分得力殊未易到略略主人不得力逐  
怒便喚做心移故曰遷憚改便不是主一故曰貳考之  
字義遷登也人怒則心便高難於遏捺得下貳副也相  
裨益也人有過或拒不克受或惡不喜聞或文或飾每  
每多添却一層顏子心境到常平地分任風有吹而浪

無湧曰不遷顏子心境到常見過地分如煙斯消而澌向泯竝不增添益曰不貳

大教復者復之於虛明平正也語意本圓昨又僭下商量一語蓋為世多執見者發以執見觀曰復之於虛明必且以為先有不虛明之時而後復之於虛明復之於平正必且以為先有不平正之時而後復之於平正是則如前人所云失而後復斷而後續而非易之剝復循環之復故云然微獨剝復夬姤亦然天地混闢之真

消息於剝復夬姤皆可見此全體之微幾也然聖人贊  
易言幾獨於豫於復兩言之豫已動之幾復方動未動  
之幾已動之幾即豫體方動未動之幾即復體大教云  
不幾不足以言復正謂復與幾無兩義耳若云復之於  
虛明平正微似復之於幾似以幾為主而復之似以虛  
明平正為體而復之恐即復是幾即復是虛明平正之  
體不可以虛活字樣看做復故雖本無可疑尊見亦自  
瞭然而僭求商量如此 六

泰否初茅皆曰茹皆乾坤之初之根泰初是至健之根  
否初亦至順之根有如是之根又合乾坤三爻為彙矣  
初征以經營外三陰自无不吉否初貞以君主外三陽  
既吉亦亨泰征健之能事否貞德亦合乾能勿失其初  
也泰二有全乾力量全坤轉在其手泰三若以一身獨  
承外三陰之任矣艱貞艱難也根也如物根也初茹為  
三陽之根三艱亦若聯三陰而為之根然艱以為貞根  
盤孔固平不得陂往不得復三陰外順成孚三陽內健

勿恤豈不合外內而竝禔其福乃四五孚而上卒復則  
泰極之不可久耳否二差弗失順意故曰包承包承以  
坤二直方反之小大自別順意亦別否三若以一身獨  
出外三陽之下矣包羞以坤三含章反之淑慝更別二  
承厚意之來君子或弗忍却稍與為通不生出調停之  
病必且抱失脚之恨安得亨惟大人正己無失人有承  
吾獨否故亨承不足以悅君子羞不足以愠君子四循  
理樂天所知惟命所有惟命故无咎五秉道執中於君



子中如參天喬木之為植立為息止君子有羣德不患  
孤小人相安亦若陰藉其休故既亨又吉至於上則傾  
亦否極之不可長耳泰上猶望其用師坤象非乾君莫  
與統猶教之君乾惟君子所帥也否上猶曰先否君子  
小人終為不可合之物君子終不可內交於小人失身  
於小人耳

否象言不利君子貞爻兩言大人亨與吉儉德避難不  
可榮以祿君子貞也否貞也否貞守身常法君子可與

否亨與吉體道大權幾與泰吉亨之分量同非大人未  
易與似進君子一層

否五休與姤五含章遯五嘉觀五生剥上得與諸義俱  
相發否五視內三陰蓋如天容如地略無忿疾已甚之  
為等有不忍如傷之視君子自無勞拙之患小人亦獲  
免其鬪怒之惡與君子相安於無事故曰休非真有大  
度量不能故曰大人吉

易於小人惟陰險而又有乘陵之惡如師與既濟皆嚴

勿用之戒如解之必田必射以其邪媚如狐而驚毒如隼其他則如陰陽晝夜之不能相無韓魏公云三家村里也有一箇但知其小人處之而已甚不可有忿疾之心此深明易旨者以復臨泰壯夬剝觀否遯姤十卦消息觀之惟復於五陰曰朋復同在震體但有戒謹恐懼心不論陰陽皆同門之交同方之士故喜其來泰三陰雖外順明曰小人不與為朋故曰朋亡民雖小人等吾同胞故泰曰左右民臨曰容保民剝曰民所載觀尚觀

民始病遠民君子於民曰親曰仁無所不厚曾以小人  
不得與民等視而故忿疾之棄絕之故臨咸泰包荒壯  
利貞夬遇雨雖柄在君子惟有感與包而無取乎觸尚  
乎戎若剥與觀生否休遯嘉姤含章柄已不在君子徒  
與小人為讐豈非自輸其載自不竝生自不肯休自耦  
怨自醞釀惡毒而莫之救以死乎君子成人之美不成  
人之惡尤在處小人上得力處得小人妥帖小人不得  
稔其惡肆其毒以貽害於宗社生靈此皆姤章遯嘉觀

生剝與之能事而否五之休其成小人尤大故曰大人吉也

泰中爻之用為兌震以震為重否中爻之用為巽艮以艮為重泰是治平之世人心易溺於晏安二為震恐疎懼常如雷動域中故曰用馮河不遐遺否是閉塞之世人心易至於淆亂五為鎮定砥柱不啻萬仞壁立故曰休泰以君子原始匪震無出至歸妹而震兌合德有東有西有生有成舉一世而躋之男女以正婚姻以時之

域帝乙甲剛乙柔乾甲坤乙五以坤行震若不敢為天  
下首也以祉福所止曰祉上自為帝下逮庶人而止也  
故特稱元吉否以君子要終匪艮无成五止而若遺之  
休二巽而承之以吉止而巽動不窮於德既儉何難不  
避無祿可榮身安為榮泰亨進而道行之亨否亨退而  
道尊之亨自古君子進退皆有餘裕在內內重在外外  
重否亨不讓於泰亨故於二特曰大人否亨於五又曰  
大人吉易為君子謀不為小人謀以泰否觀之尤分明七

始陽中之陰動中之靜復陰中之陽靜中之動邵子詩  
天根月窟閒來往三十六宮都是春曰都是春便知根  
窟來往滿盤都是生幾矣乃始不言幾而復言幾以造  
化平分看則有陰陽動靜之分以造化合一看陽兼陰  
動該靜復統始故如主靜說猶似以始起義從腰說起  
如慎動說乃是以復起義從頭說起從頭說起故復可  
言幾以全體該貫始不可言幾以陰無直遂之義不可  
竝陽以為主耳且不但於始言幾亦不於剝言幾以

剥剛上碩其體方寂就如一粟粒一木果完實堅固就下地也不即生須待時至後生若是收藏得好便隔却一兩年三四年也不壞也依然會生然必到下地微萌時方謂之動之微方謂之幾若未下地時總無端倪可言故不謂幾言幾欲人知劈頭慎動一脈不言幾但言碩又欲人知感通前蚤有一步寂然不動安止欽止聖功也如乾劈頭往西北仍是剥之果到艮反震方是復之仁謂剥果復仁有兩般不得然剛止言碩是大哉乾



元之全體剛動言微則全體發動之端倪雖曰剛動之端倪其實只是剛止之全體故聖人於復止曰剛反若如後儒說十月純坤陽氣消盡陰極回陽逐日漸生積到一月方始成其為復恐非聖人於復一蓊直能見天地之心之義耳八

分陰分陽迭用剛柔此通乎六十四者乃夫子彖易止於噬賁節三卦言分噬節俱言剛柔分噬又言合節言剛得中噬言柔得中又言上行賁言分剛上柔不言分

亦不言得中云何天向一中分造化天地節而四時成  
二分二至皆中春秋言分冬夏言至以冬之至為日南  
至短極陰極夏之至為日北至長極陽極惟如二分乃  
日晷黃道陰陽之中即天腰赤道之中天惟此一中春  
秋分分此節惟此一中剛柔分分此故節之剛柔分乃  
春秋分之分一中分造化之分節無不中所以為分分  
無不中所以為節若噬之剛柔分剛下震而動柔上行  
而明可分可合故言分又言合柔中非可自為中原麗

乎剛中以為中非上行則無貴故又言上行貴柔在下  
非如噬柔上行貴剛上止亦異於噬剛下動故柔來文  
剛不言分亦不言得中明其主不在柔剛上文柔言分  
明貴剛之上止無異於節剛之得中而主在上其餘隨  
蠱咸恒損益漸歸妹則無離坎剛柔之中因井豐旅渙  
既未濟雖得離坎剛柔之中然於分義皆無取即如渙  
者節之倒體節言分澤止之體有限制有分段渙不言  
分風散之體無限制無分段耳九



易象鈔卷十六

欽定四庫全書

經部

易像鈔卷十七

詳校官太常寺少卿<sub>臣</sub>陳桂森

通政使司副使<sub>臣</sub>莫瞻菴覆勘

總校官中書<sub>臣</sub>朱鈐

校對官中書<sub>臣</sub>石鴻齋

謄錄監生<sub>臣</sub>方汝觀

欽定四庫全書

易像鈔卷十七

明 胡居仁 撰

書

答友人

來教天地人之動無端六爻之動亦無端天地人之動  
不已六爻之動亦不已似若天地人之動與六爻之動  
分為兩截便非義文周孔之易亦即有板定移動不得  
之處鄙意直謂易外無我我外無易乾坤成列而易行

乎其中者我也爰也者效天下之動我此身無一息而  
不動一息不動即死即來教云一息不動則人道缺是  
也既無一息不動便是無一息之動而非三極之道苟  
非其人道不虛行直妄動耳無所謂道也聖人教人學  
易不止求諸書全是求諸我一息之動而得便成吉象  
一息之動而失便成凶象故曰吉凶者得失之象也一  
息之動而能憂能虞便成悔象一息之動而弗憂弗虞  
便成吝象故曰悔吝者憂虞之象也一息之動而進以



禮退以義進救民退修己日就月將日新月盛便成變  
象久而熟焉利而安焉不知所以然而然焉便成化象  
故曰變化者進退之象也一息之動而為晝之旦便成  
剛象一息之動而為夜之晦便成柔象故曰剛柔者晝  
夜之象也無息而無動動即是爻無動而非三極之道  
爻即是道君子居而安樂而玩者如此而已矣來教列  
吾身之之貴賤云云此實獲我心者又云以易書之易  
為吾心之易以吾心之易會易書之易則程子云易不

止是一部書似無兩樣見解此處體說未至終是易自  
易而我自我來教畫有畫之道乾為動直坤為動關於  
人為感通夜有夜之道乾為靜專坤為靜翕於人為晏  
息畫非自畫而為夜之根夜非自夜而為畫之根與夫  
子逝者如斯夫不舍晝夜之云微有未合不舍晝夜曰  
逝通乎晝夜曰道此處間不容髮一息而舍即非逝一  
息不通即非道人之感通宴息無截然晝夜之分如人  
睡去惟氣極昏濁之人纔有不覺不知處稍清明炯炯

靈明便瑩然自在有夢無夢吉夢凶一一記得此通  
乎晝夜之道而知時有晝夜而此知無晝夜念有動靜  
翕闢而此知無動靜翕闢神无方而易无體便是此箇  
道理陽明先生喫緊為後學提醒良知即此通晝夜之  
知亦即乾知大始之知細細體認日間念起念滅一一  
能知夜間有夢無夢一一能知大學欲誠其意先致其  
知亦以意猶形而下日之念夜之夢皆意所變化知乃  
形而上超乎念而下視乎念超乎夢而下視乎夢今人

念慮紛飛中一覺即無魂夢擾亂中一醒即無以門下  
高明諒必有以覺此醒此矣一

承教鬼神不可分經內有況于人況于鬼神以鬼神對  
人豈以兩而對一乎最是但此以幽明生死鬼神竝舉  
幽明無二故死生無二說鬼神無二情狀歧而二之者  
支幽有鬼神明有禮樂生為人死為鬼聖人以神道百  
姓與鬼謀強而一之者混第以鬼神分邪正直是不通  
之論耳可一筆抹殺也今須密切反諸人身而求之尋

常怨詈人則曰鬼稱許人則曰神詩書記載之所及曰  
生而神靈曰乃聖乃神此斷不可移神而為鬼者也曰  
某為鬼躁某為鬼幽曰為鬼為蜮則不可得此斷不可  
移鬼而為神者也即如經內曰天生神物曰神而明之  
神而化之曰陰陽不測之謂神曰非天下之至神其孰  
能與于此曰唯神也故不疾而速不行而至曰神以知  
來曰神明其德曰民咸用之謂之神曰鼓之舞之以盡  
神曰精義入神曰窮神知化曰知幾其神曰幽贊神明

此處似添不得一鬼字曰人謀鬼謀曰載鬼一車曰高宗伐鬼方曰震用伐鬼方此處似添不得一神字竊意鬼神為德之盛質諸鬼神而無疑與鬼神合其吉凶此鬼神乃與人相對並舉之鬼神不可分言之鬼神也其他則言神言鬼各有攸當猶之幽自幽而明自明生自生而死自死神有神之情狀鬼有鬼之情狀似若微有分辦又如中庸言鬼神之為德似不是直言鬼神德者得也言其質鬼神而無疑與鬼神合其吉凶有得於鬼

神之德故以言其盛也其曰視之而弗見聽之而弗聞  
體物而不可遺此鬼神為德之盛非鬼神之盛也使天  
下之人齊明盛服以承祭祀洋洋乎如在其上如在其  
左右此當下與鬼神合吉凶當下質鬼神而無疑者也  
進於神之格思思與神格不容測度不容厭怠此齊明  
無久暫之渝盛服無離合之間時時承祭祀時時洋洋  
如在德至此然後為德之盛也故曰夫微之顯誠之不  
可揜如此夫也若脫去為德字樣直言鬼神之盛便不

成文理矣易言鬼神之情狀只是情狀鬼神與質而無  
疑合其吉凶亦似微有分辨二

承教示心得又近日多暇云云凡人此理不到手恁從  
舒暢瀟灑總謂之碌碌營營去聖賢名教樂處霄壤此  
理到手曰暇時時暇也論語中言君子之泰君子之  
和君子之坦蕩蕩此暇境也子貢方人子曰夫我則不  
暇暇在我也發憤忘食樂以忘憂不知老之將至憂食  
兩忘老矣不覺暇之至也善吾生即善吾死生固暇死



亦暇也且夫死者形骸軀殼有時而壞如花之必謝葉之必落者耳我之所以為我者固與之而俱死否乎夜者晝之驗死者生之驗旦晝不清夢魂必濁生如無得死必無歸子之發憤憤義從心從賁賁明也不憤不啟憤斯啟矣忽然夜半一聲雷萬戶千門次第開憤而啟也時時憤時時樂終身憤終身樂不憤即不樂不樂即不暇衆囂囂而雜處咸嘆老而嗟卑衆咸嘆老子獨不知老則暇與不暇之究竟也來教云變化之成即鬼神

之為鄙愚竊亦有合看乾卦乾道變化各正性命政自分明即以吾身觀之九竅百骸六腑五臟何處不是相得有合若有一之不相得不有合便是病病甚即死此相得有合處即是成變化即是行鬼神總在人迷悟之間耳來教云揲著之法只是一箇變化知變化則知神儒者有云信手拈來頭頭是道揲著之揲即信手之拈也拈來皆是此理所以謂之行鬼神不特拈來行住坐卧磕著撞著都是此理來教云易之為書非聖人思為

之所及而其全體不過寂然不動則是易也從聖人之  
極深研幾出來也至通志成務此所謂感而遂通也鄙  
愚尚未能無疑謂幾深即是聖心中不動本體則可謂  
聖心不動非思為之所能窺測則不可竊疑惟无思无  
為所以謂之寂然不動也所以謂之深與幾也所以謂  
之感而遂通天下之故而至神也且夫寂之與感不可  
判然分為兩截請以鏡喻鏡體光明何思與為常寂常  
照何時有動何時無照不是隨物妍媸之故寂照之中

天地皆涵何等深微若是鏡中留些形影就如心中著些思為寂者動而感者窒矣聖人極深研幾完其本體之謂也無思思之故也無為為之故也感而遂通天下之故即所謂故吾也來教云往來是吾人所不容無所病者憧憧及造化往來物理屈伸皆自然而然正為吾人學問張本竊疑本義亦原如此但順理著意之間工夫細密卒難到手又致用崇德以尺蠖龍蛇求之總是人之屈而能信蟄而能存處龍蛇之蟄以存身君子之

蟄以致用以崇德似皆是同歸殊塗一致百慮之學問  
來教云知險知阻非知事之險阻知吾心之險阻理本  
至易而出乎易則險理本至簡而出乎簡則阻云云至  
矣但心之與事即異教家亦有金獅子章之說以金作  
獅子看做獅子渾身是獅子而獅子之外無金看做金渾  
身是金而金之外無獅子若要獅子之外覓金物外尋  
一箇理事外尋一箇心心事切開兩片如何謂之合外  
內之道也 三

答耿庭懷

恭惟文學書院之修舉實東南千古創見盛美<sub>某</sub>雖不

肖已有神遊鄙願矧重之以召命之臨古易前已領教  
會語急讀一過執事真精神真學脉已若溢出而莫可  
遏於前矣內與元質夜話六義中有人各一見之云此  
真實體驗語也像象蕪刻原不足塵台目中間甲庚自  
是不易惟已日出不肖之臆而執事更以乙辛丙丁壬  
癸窮之實是茫然不知所措雖然舉十千而盡象之于

辭謂某卦納某干則後世術家之論耳恐文周不然只謂五行是天地間正當道理出震為甲入兌為庚坎中一陽為生信為戊離中一陰為成信為己不妨實指以示人然文周于戊義猶舍于解卦中則正不欲瑣瑣定指如世間陰陽五行之術耳若究而言之易中兩處稱帝乙實即是甲乙之乙商家原有帝甲乃不稱帝甲而獨稱帝乙謂泰之五歸妹之五皆出震之柔爻故獨以乙為象而不稱甲以混也以甲庚乙己之例反以三隅

言文明處為丙丁言游水處為壬癸震之剛爻為甲柔爻為乙則兌之剛爻為庚柔爻為辛亦彰彰明矣一

伏承教示言言心得不惟

某

之誦陋蕪穢之病一一為

之照破而執事之獨立物表遐觀域外之深思亦畧得使瞽愚闕覘彷彿其一二矣感謝感謝內中精義容細細紬繹以請未敢漫以臆對以上負提命至意惟是食子肉進淫女禍君國褒姒之淫慝文王實市之而以亂亡尤物溷其君等語頗覺駭人明夷之六二曰明夷夷



于左股用拯馬壯吉象曰六二之吉順以則也如來教云云文王之不順不則莫甚矣此恐干係世教人心不小也昔人有言易竒而法今似單以竒言矣天地人物不敢多為支離即如今日百姓有以偽來執事惟以誠應一人由是千百人由是此所以為虞山之賢父母也此所以為善用易也此所謂易有太極也謂執事有誠外之應理外之應恐執事又自不肯招認矣 二

來教以易斷然為知來之書知來必兼數往世未有知

來數往而不假借於甲子者如云後此幾月幾日或幾年幾月幾日必自今日某甲子至後來某甲子方有的據上古聖人作易即作甲子易包羅天地人物而甲子實經緯於其間文王繫易獨露甲庚己三言餘皆不露此必有不傳之秘在故以為鑰也即伏羲當時亦八卦甲歷並興云夫原初聖人畫卦止是畫出乾奇坤偶兩畫示人俾天下盡行曉得人之所以為人底道理只有此兩畫定要掛得到身子上如掛得到身子上便喚做

人如掛不到身子上便不喚做人其曰八卦定吉凶掛得到身子上人也吉之定定此也掛不到身子上非人也凶之定定此也聖人非欲預知人後來之吉凶而謂之定也其曰神以知來知以藏往往古吉凶之理即今來吉凶之理今來吉凶之理生于著往古吉凶之理具于卦卦爻缺一而往無以藏矣著數缺一而來無以知矣藏往體天地之撰知來通神明之德類萬物之情藏往先天地之始而無其始知來後天地之終而無其終

藏性无極而太極知來太極本无極藏性考三王而不  
謬知來俟後聖而不惑藏性曰知以卦為知而卦外無  
知初非世之伎術之知知來曰神以著為神而著外無  
神初非世之神通之神茲義自孔翼外已盡湮晦無有  
不賺入京焦伎術去若甲子又似緣卦畫而起今以甲  
子為易之鑰則陰陽歷日視之易詎不為尤要歟恐治  
歷明時止是六十四中一卦之義耳夫易逆數也謂知  
來之書詎曰不然顧聖人之言知來也以吉凶之前定

為來乎以吉凶之貞勝為來乎如吉凶皆前定中和位育盡性參贊祈天永命等又安所用之行險僥倖將無所不至矣如吉凶皆貞勝則遇災而懼反災為祥矣恃祥而忽反祥為災矣易占義理之占徵往詔來之大業伎占禍福之占揣摩推測之小數自秦漢以來盡以伎占為易占蓋大儒而猶未免矣

來教乾坤二卦為諸卦門戶闔闢往來六十四卦盡在其中有個闔捩子麼既謂之乾坤自然一闔一闔闔戶

謂之乾乾則自關闢故為乾非乾之外又有關揆子以  
為之關也闔戶謂之坤坤則自闔闔故為坤非坤之外  
又有關揆子以為之闔也

來教升謙泰艮臨損節師渙蒙大畜中孚諸卦中爻各  
含震何俱不繫以甲云云蠱言甲以震為象此不易無  
疑如升謙等卦亦復繫以甲聖人而為此重複文字則  
非所以為聖筆矣雖然升之三曰虛邑四曰亨岐震為  
大塗故虛故亨也謙四撓五侵伐上征震動上行故无

不利也泰五曰帝乙歸妹兌為妹震為歸也艮四曰艮其身下止為屈上動為伸艮止而震行也臨三曰既憂之反說以為憂懼者震體也損二戒征懼妄動節二戒不出懼非所止而止皆震也師貞丈人吉長子渙奔機蒙筮初大畜逐良馬中孚鳴和之鶴皆震象皆甲義也不重複繫甲而與甲相通者也

來教瞽瞍殺舜紂囚文王為理外之變浚井而出與夫食子肉進淫女為理外之應云云據史記舜穿井為匿

空旁出若然贅以非理加舜變也舜之應之有空可以  
匿又可以出初不失其常矣紂以非理囚文王變也文  
之應之據子之翼易曰順以則初不失其常矣食子肉  
進淫女之云似當入齊東語類中且惟極天下之至變  
而初不失天下之至常故言不可為典要而即足其義  
曰既有典常夫是以謂之易有太極也若云稍變尋常  
莫非理外翻倒太極矣

來教象數失傳謂用象用數之孔竅如言象雷以動之



一段與天地定位一段卦位因何不同帝出乎震一段  
與雷以動之一段卦位因何又不同神也者一段因何  
單言六子此等處謂孔子不傳象學不可若謂今人能  
傳孔子之象學吾必以為未當期之日與萬物之數必  
非徒為模擬四營十八變豈是操著小法此等處謂孔  
子不傳數學不可謂今人能傳孔子之數學吾必以為  
未當惟邵子得象數孔竅邵子曰天數二十五合之為  
五十地數三十合之為六十及存一去四云云及孔子

即象數中贊出許多理趨後人遂單認為言理之書為  
誤云云夫象數失傳謂言象言數者溺四聖人之意則  
可若徑謂孔子不傳象學數學然則易翼中所言又何  
物乎謂今人不能傳孔子之象學數學可若謂又有用  
象用數之孔竅在象數之外然則象數又何物乎邵子  
曰易大衍聖人之倚數也天數二十有五合之為五十  
地數三十合之為六十故曰五位相得而各有合夫聖  
人明言天數五地數五五位相得而各有合天數二十

有五地數三十凡天地之數五十有五此所以成變化而行鬼神今却云天數二十有五合之為五十是兩個二十有五矣此從何來地數三十合之為六十是兩個三十矣此又從何來天數二十有五外劈空加一倍地數三十外又劈空加一倍是天地之數凡一百有十矣何以云凡天地之數五十有五也此邵子之倚數而非聖人之倚數一邵子曰五十者著數也六十者卦數也五者著之小衍也故五十為大衍也夫卦從著立著以

求卦非著自著而卦自卦也以五十為著數單是天數而地無與矣以六十為卦數單是地數而天無與矣總天地之數為五十有五虛五不用故曰大衍之數五十如曰五者著之小衍彼五十者單是天數乎抑兼地數而為言乎抑就天數二十有五而衍其五乎抑就地數三十而衍其五乎如以五十止是天數天數無兩倍也如以五十專為著數六十專為卦數以著則不通於卦以卦則不通於著卦專屬地不應有乾坎艮震等策矣

著專屬天不應有巽離坤兌等卦矣此邵子之行而非  
聖人之衍二邵子曰著德圓以況天之數故七七四十  
九也五十者存一而言之也卦德方以況地之數故八  
八六十四也六十者去四而言之也夫著之德圓而神  
謂卦未立而以著言如天體之圓而無方所故曰神耳  
非著單屬天數而不兼乎地也卦之德方以知謂著既  
揲而以卦言如地體之方而有定位故曰知耳非卦單  
屬地數而不兼乎天也大衍之數五十合天地之數而

衍之虛其一以為太極故用四十有九謂四十有九適  
合七七之數可謂五十為存一而并言之亦可乃謂卦  
數六十四六十者去四而言之豈如六十為節去中孚  
以下四卦之說乎吾誠不知何故而去去且欲何之矣  
其曰著用數卦體數用以體為基故存一體以用為本  
故去四豈天為用數而地為體數乎抑陽專屬用而陰  
專屬體乎圓者本一故著存一已不相通方者本四故  
卦去四尤無去處其曰著之用數七并其餘分亦存一

之義掛其一亦去一之義與分二掛一歸奇之義不勝  
刺謬且既謂之自開一門戶自成一體裁又何能為文  
孔之註疏也易以象為像數為衍今人不得邵子之意  
其於皇極經世之言象也象而已像何在乎于其言數  
也數而已衍何有乎易之言象數也以定天下之吉凶  
今人之言象數也欲預知人未來之吉凶二程夫子與  
邵子同里開數十年絕口不言蓋預稽邵子之流弊耳  
來教以後人單認易為言理之書為誤遂因病某始終

認理為易云云易之為易繫辭中已有明訓之用多為  
葛藤約言之乾坤兩畫一闔一闢而已試駁此兩畫湊  
手乎未乎如其湊手言數即數言象即象言理即理如  
未湊手言理非理言數非數言象非象來教云知易即  
知幾造化之妙隱於無而不能不露於幾以邵子聞天  
津杜鵬而知二十年後南相之禍以致亂豈無他人而  
獨曰相年數豈無遠近而必曰二十此非易不能此處  
謂非易易之為道百物不廢也此處謂足以盡易恐義



文周孔之大吉不如是之瑣細矣且夫京郭管李等先  
知之術果義文周孔之大吉乎果與邵子可以例論否  
乎以京郭管李等例邵子不知邵子者也以邵子例義  
文周孔謂之知義文周孔或未矣尹和靖曰康節之學  
本是經世之學今人但知其明易數知未來事却小了  
他朱子曰康節能盡得事物之變却於大體上有未瑩  
處或問朱子曰先生須得邵堯夫之術朱子曰吾之所  
知者惠迪吉從逆凶滿招損謙受益若是明日晴後日

雨吾又安能知耶此足以知康節之于義文周孔不可以例論矣抑邵子之自言曰物理之學或有所不通不可以強通強通則有我有我則失理而入于術來教以認理言易為謬誤得無為邵子之所未許乎又考邵子之言循理則為常理之外則為異矣初未以理之外為易也三

古易質疑 六條

易猶鎖也鎖必有鑰而或者不明其鑰又舉而投之汶

汶之地俾天下馳而不返則學易者之過也竊疑易既  
爲鎖未知何者爲鑰抑未知以鎖爲象乎抑言其鎖而  
不開必待鑰而後開乎闔戶謂之坤闔戶謂之乾一闔  
一闢謂之變易也非其常鎖而不開常闔而不開又有  
一物可名爲鑰用以開易之爲鎖者如謂另自有鑰以  
爲開鎖之具未審即在易內歟抑在易外歟不肖正投  
之汶汶之地者敢請發鑰

武王滅紂實爲丁丑之年武之出兵厥日癸巳受命踐

祚厥曰己卯三言於斯悉符云云竊疑易有甲曰庚曰  
己曰之象並無丁曰癸曰之象言丁言癸訓詁家添出  
之辭耳今援以爲丁癸之符又甲曰繫於蠱庚曰繫於  
巽與革義似不相蒙或丁癸已三言與武革命之事符  
矣象易聖人謂湯武革命順乎天而應乎人武適有符  
而湯則何徵蠱言甲亂則有治終則有始之義巽言庚  
巽為進退不果庚乃斷制之義丁癸雖或有符而義象  
則似無取又如革之為義乃徹骨徹髓盡為翻轉透底

變化之大學問大人虎變未占有孚龍興而雲從虎嘯而風烈天下莫不風從之象亦非定指征伐為革命為虎變大人君子有透底變化之學問尤為革命之大虎變之大者總之要自黃離已日中流出兌離合而成革離即已兌即庚已而庚庚因已有徹底變化之象庚已大義似不過如此

一邵子循理為常理之外為易故易也者變也變也者權也及唯變是適不論常理云云竊疑不可為典要唯

變所適詳其上下語意猶云不可以上下剛柔為典要也唯變所適謂上下无常剛柔相易變之所適無適而非典要非其無典要也後結言既有典常謂以典要為常原始謹初率其辭之所指揆其方之所向出以度外入以度內卦卦所適之變盡以典要為常而有其常爻爻所適之變盡以典要為常而有其常如是則得其人而道行故曰苟非其人道不虛行也昔者聖人之作易將以順性命之理一部易皆性命之理也以理之外為

易則謂易爲變將變在理外謂變爲權在理外豈常爲理而變非理乎豈經爲理而權非理乎若謂有理外之變理外之權是以有理外之易常理在所勿論之云亦邵子之易非義文周孔四聖人之易也

一象數失傳無從討究雖幸有邵子之皇極在而汗漫難尋機闕尚隱云云竊疑易有卦爻卦卦象卦卦數爻爻象爻爻數也易在而象數在如以乾言之六畫皆奇乾之象也六畫皆乾奇之數也潛見惕躍飛亢皆象也

初二三四五上爻各三十六策合之二百一十有六策  
皆數也舉一卦而卦卦之象數可推舉一爻而爻爻之  
象數可推不知何以謂之失傳若邵子之皇極自是邵  
子之象數與易之象數似若實不相蒙然總不出易之  
象數中

元亨利貞易之四變也仁義禮智人之四應也假令當  
體仁而嘉會當和義而貞固已失其所以應變云云竊  
疑元亨利貞四字已該盡一部易理總之一體分作四



截一氣分爲四段故有此四字名目假令當體仁而嘉會如春行夏令也當和義而貞固如秋行冬令也正以失其常理故至此聖人言易有太極常也周子翻之曰无極而太極太極本无極无極易也太極不易也至易而不易不易而至易至變而不失其常至常而未嘗不變此所以為易謂易不論常而專論變應變為易而拘常非易此足以破世人拘常之固而於易有太極之義似屬未圓又仁義禮智雖名性之四德其實只是一德

時出一德者乾坤之元也元德虧欠易失全體遂有應用反背之處耳

用易之道有三有無心之用有有心之用有引証之用凡無心中忽有變動或身或物卦象自呈則幾來矣則用易之候矣故曰幾者動之微吉之先見云云竊疑人外無易易外無人俟幾來而後用易則易有達人之時矣且所云幾者謂何幾者動之微天理迅動之端倪也聖人於復言幾於豫言幾復雷在地中豫雷出地上執

事所云邵子雷起之間雷起者帝出乎震之旨也寂而感晦而朔亥而子皆雷起之義象執事無心中忽動其謂是與顧無心之變動義亦微有不同寂而感之變動或雷在天上或雷行天下此乾道無心之變動也晦而朔亥而子之變動或雷在地中或雷出地上此坤道無心之變動也聖人不于乾道之變動言幾而特于坤道之變動言幾此其義微之微矣是故雷自天行起之自天乾道也聖人分上事也雷從地出起之自地坤道也

賢人君子分上事也夫易聖人所以極深而研幾堯舜  
兢兢業業一日二日萬幾俟幾來方為用易之候踈漏  
似屬太甚矣如何如何

古易題辭

易有今古之異乎義畫文彖周爻孔翼皆古也無今也  
今古之分漢有費直本初畫全卦再畫本卦又畫覆卦  
繫以彖爻與用九用六之辭後以一傳字加彖傳之首  
鄭立本於費本有省移初九至用九爻位之文加爻辭

之上合彖傳於經於彖傳加彖曰字於象傳加象曰字  
王弼本移文言附乾坤二卦之後加文言曰字以孔子  
贊爻之辭本以釋經乃各附當爻每爻加象曰字歷代  
因之是為今易漢藝文志云易經十二篇呂大防定為  
經二卷傳十卷晁說之釐為八卷呂祖謙復定為十二  
卷一以古為斷是為古易瀛海耿侯之述古易其自象  
象以下有所更置序正者易辭也其于易畫上下二篇  
以今文上篇三十卦一百八十爻下篇三十四卦二百

有四爻通為六十四卦三百八十四爻古文上篇一十八卦一百有八爻下篇一十八卦一百有八爻通為三十六卦二百一十六爻變之即六十四卦三百八十四爻侯之言曰六十四卦三百八十四爻易之體也三十卦二百一十六爻易之用也文王泄天地鬼神之秘於指掌其用至妙而難言故寓不言之意于譜卦之中使學者得意而忘言嗚呼得意忘言茲侯之述古之遐思乎本至愚極陋原不能言而竊逆以意卦有六十四

而侯譜之止於三十六乾卦一爻之策數也爻有三百  
八十四而侯譜之止於二百一十有六全乾六爻之策  
數也侯嘗憂象數難明而謂象數立則天地鬼神未來  
之秘如指諸掌舉全易之象而統之於乾象舉全易之  
數而統之於乾數乾象立天下其有遺象乎乾數立天  
下其有遺數乎本又反覆以研侯意反對三十六卦其  
實又只是六大卦如卦之有六爻自乾坤至畜履合六  
卦為一大卦自泰否至噬嗑賁自剝復至坎離皆然此

上篇三大卦也自咸恒至損益合六卦為一大卦自夬  
姤至漸歸妹自豐旅至既未濟皆然此下篇三大卦也  
乾坤陰陽剛柔之所自始管領二大卦如卦之初二兩  
爻剝復陽剛消長之際管領二大卦如三四兩爻夬姤  
陰柔消長之際管領二大卦如五上兩爻是又合三十  
六而止成一卦六爻云爾此正所謂易簡而天下之理  
得象豈遠乎哉數豈多乎哉豈凡今學易者之所易窺  
乎哉昔者堯舜稽古精而一孔子好古博而約侯懼



人之多言無當而曰學易者用易之謂也古易之譜譜  
此或曰文之序無改於義畫也侯之譜無改於文序也  
余曰文雖無改於義然不曰易興於中古乎侯茲無改  
於文而譜之意則遠矣思挽今而進之古者至矣視世  
之窮年屹屹殫精註解以言求易而卒無得者相去遠  
矣萬歷丙午秋季之吉

易像鈔卷十七

欽定四庫全書

易像鈔卷十八

明 胡居仁 撰

詩

先後天圖雜咏

十六首

坤乾夾兌夜歸坎艮巽扶雷震向離識得坎離升降義  
幽明何事不通知

乾坤南北有常位離坎東西亦定之不是希夷傳絕學  
四偏妙用少人窺

巽兌依乾日麗東山雷親地月華西義皇聖訣歸丹訣  
千古人心盡自迷

龍虎鼎中調日月山河架上定坤乾世人不解先天旨  
妄謂堯夫有別傳

乾坤性命千年正日光華萬古明山澤風雷函變化  
此身端不會虛生

離往乾中坎就坤兌開坎戶震離門生化化無窮了  
只爲陰陽自互根

巽兌相反艮震通巽坤乾艮亦相同陰陽變易終何易  
應識從來有主翁

坤虛坎到中方實乾實離來中乃虛自是誠明千聖脉

寧容異教妄加淤

念菴義皇去我久惟有卦畫存先天果何在南北分乾坤沈冥測要渺陰

陽互吐吞當其往來間逆者爲天根太極本无極沿流豈無源如何大易内有圖不盡言翻令伯陽輩窺竊稱

門專

四正陰陽互構精四隅根窟各分明安排謂屬義文手

天地文章豈誤成

翻倒先天與後天東南東北只依然乾坤密意流行處  
莫是義文亦慎傳

二判鴻蒙八已成更于四六要分明四如无象六无位  
千古人心總是育

十不平分何謂然九南一北露真詮更將三七後頭看  
全體時中義盡傳

一六源流未實研後先消息總茫然虞廷明指危微訣

更藉圖書以象傳

先天乾一坎六  
後天坎一乾六

八德原超形器論如無變易亦空尊時時處處盡翻轉  
方有工夫許入門

天分於乾一力擔地功坤外別無堪都來六十還餘二  
兼兩兼參故號三

全體乾坤唯當念周流妙作六虛環僅從畫後窺精意  
混闢源頭尚一間

先天八卦吟

六十四首

乾一八首

太極何形寧有象三奇知是極傳神分三遂作三才位  
成位乎中止一人

不探儀象卦爻先乾畫將來止作天見到羣龍畫无首  
方知乘御有人乾

人乾要識統天乾天不違人人在先若以地論單是順  
難容翻立到人前

一息之微是一元敢於方寸不知尊但教弗失司南意  
便任從頭論到坤



物物之生首在先其生也直是人乾橫斯禽獸倒草木  
太極應無偏與全

四千九十六分之一義何曾有動移首出自來尊莫對  
言无都屬後天時

為問何為无極真七俱陰雜一陽純仙流且竊成冲舉  
聖學難容獨腐陳

認之為天盡在心認之為命修在身庸言庸行只斯今  
斯今不了俱無人

兌二八首

浩渺東南直接天澤天一氣共迴漩畧為分出澤頭面  
遂作天工二義傳

時物行生誰與言不言為說有來原人人口伏天為兌  
最忌貪天作口恩

坎水陽施兌以陰兌陰說物義深沉從肌

闕

祇了無言一片心

離在陽儀已結精震來更若有聞聲獨濡湛湛彌天澤

默與天行一樣精

對宮有艮方通氣後列為離到即晞妙悟太虛雲一點  
不應名遂始西歸

乾陽自上忽交陰祿施無窮已上淋非待決之然後決  
決之斯作後天吟

圖書于二行稱火象立東南以澤論澤火分形相息滅  
誰曾一體反探原

八原如輻貫一轂二更天南近至尊有喜同人盡歡忭

欣欣草木亦俱蕃

離三八首

陽明曾不自為光  
認照為明更渺茫  
知有精凝懸象外  
求明安得但東方

太陽盡道屬人心  
心性微分索細吟  
不向性天求旦旦

自東雖出總露霓

露音音  
霓音沈

夜晦晝明為日麗  
通乎晝夜是人離  
若非卯酉天門見  
那得三才配兩儀

天三是木離何屬火體無形麗始成人不麗行憑獨見  
天根月窟總難明

三生萬物一生三萬古文明盡此函不到後天方易位  
日躔原只在天南

兌始陽消次即離於乾全體總無虧自非虛極中如洞  
安取東方獨出寅

寅以夷翼  
真二切

水火既稱相不射水何有燠火無寒世人不悟陽尊理  
先合從東一醒看

未三之前麗何形有三之後然一星然之遂足照今古  
不然不足照一櫺

震四 八首

由來天載寂無聲子半聲聞已後庚肯向不聞先恐懼  
往來應謝游為驚

極陰之下一陽起謂是天根舊在誰若欲按圖尋起處  
恐于初晝已傳枝

少陰三四屬同根震不先離妙義存明未東方先有震

轟天盡恐作驚魂

行天風起金為母奮地雷來木作公長木首司翁媪事  
滿函生氣已先東

陰非陽迅錮難開陽不陰蒙銳易推識得先聲隱東北  
動幾眇忽敢輕來

盡道艮翻纔出震誰知雷轉化山靈暫來東北分先後  
動屬先聲止後形

凡聲聲必自無聲東北何聲輒有驚未徹聲俱從寂發

空煩揣料發前情

一分至四俱為動悔  
吝凶災俱動生為有震要全動體  
四无傾後八俱貞

巽五 八首

一氣陰陽神不測  
無心寂感妙隨時  
塵氛自不來  
天宇也合先幾為一吹

有竅生情輒怒號  
化工原不著絲毫  
相逢莫漫分根窟  
來往雖閑密有操



坤未來時定倚乾天教噓拂我何權坤來遷出東南去  
一切吹颺更對天

陽儀終震慎出往巽始陰儀逆入探入義不成安有出  
先天一逆在西南

陰初曾不異陽初一闔專來歛一舒面目況從中五出  
不東南也總春噓

五惟中數巽當之入不于中義盡瀉有欲先風知所自  
一无偏倚是颺颺

風雷相薄俱神氣風比雷聲更遠徵千百世懸分上下  
前如有作後俱興

後乃為雲先則雷雲飛雷厲每俱來須臾雷雨齊收捲  
景與清寧一樣開

坎六八首

陽函陰魄三通偶陰孕陽精六亦奇三六看來俱互體  
東西不射更何疑

人言兌決成流水那識原通澤始鍾水派莫詳流自出

焉能江漢識朝宗

乾居一位坎為六六以乾居坎一之一六後先更互見  
渾淪淵浩少人窺

有物渾成萬理宗先天何陷可形容只看陽在陰中象  
便是層層險萬重

五前不作上巽水七後仍非下出川五七同根方靜翕  
欲窺發象竟淵淵

萬折流來必自東沿流誰會汴西宮從西逆數知居六

方識源頭處處通

體原陽水數居陰空水雲時淵更沈向北有遷陽得數  
子前依舊是希音

本體從初有習占原非文手為加添游來都是源頭水  
纔習無波不是恬

艮七八首

動靜互生原不易陰陽迭運更非遷應知止義從頭定  
七未分來象已全

論形真是一卷少得數將無七亦多最惜當前無爾卓  
空於萬仞嘆嵯峨

少男那是偏慈母嚴父常令事四方陟岵自增游子感  
母前安忍不傍徨

積氣曾聞一笠輕巖嵒那得是山情後人侈說艮成義  
那識崑崙天柱擎

天不遇山方有趣有山天不在山巔少男一握先天掌  
更不山中又覓天

乾坤重擔在人承  
小子從初便欲勝  
恃却光明少停待  
轉頭不覺是翁稱

造化有流應有時  
七如為六砥中流  
到頭與八相函附  
更欲同銷巖險憂

睇望二情方忌滿  
回思七義復憂傾  
同攜五六歸坤靜  
一靜能教萬動貞

坤八八首

承天應地始名坤  
地道光時天更尊  
擬向後先尋牝義

尚疑終未徹坤元

乾陽盡隱坤陰見坤是全乾隱象自謬執坤消是虛體  
世間何物不空淪

天然定位列尊卑一義無為八有司由八逆行要到二  
盡頭都為一捐糜

奇偶纔分輒八論要令六子盡承尊從初便是無成義  
不待元黃入語言

南北有經樞在北圖書俱以北為原但迎自北來南氣

地軸天維萬古存

裳衣上下總綱維治極黃虞只正垂又欲西南問行往  
黃裳更作萬年儀

鳩飛曾不到差池定分如何可一移試看兩儀終至八  
是中主宰默相持

方圓相倚無綦重定得圓來每屬方先向北方求定義  
一九彷彿已中央

後天九章吟八十三首



坎一九章

物命要歸盡有根人生安得弄精魂若知竅妙天山裡  
第一源頭怎自渾

從坤立命歸乾始自坎翻身亦九還坎不離坤為性命  
淵淵根柢在人間

外陰任裏千重險不蝕中陽一點光萬古人心盡如此  
北窻何事夢羲皇

一墜斯須便八層到頭猶喜是淵冰若非寒極冰為骨

淵底如何有一升

一綫微陽伏九淵發來雷雨便彌天世人未識坤藏旨  
蟻穴針芒處處穿

精在重淵已媾成不緣出地始稱明大明若向中天覓  
依舊沈沈是黑阮

一物如何八物分八分仍是一為君淵潛具足天飛量  
即不興時也自雲

坎窩人人故自投也緣坤坎不相求若教履險如平地

步步光明到盡頭

地在天中似易知  
天居地內索沈思  
能於晝夜通為一  
方是劈頭相見時

坤二九章

老退西南事合休  
如何與坎緊相求  
兩間男女俱無恙  
尚抱遑遑陷溺憂

恒言重濁疑為地  
亦謂惟坤乃地名  
偏局西南既非義  
輕清分得怎資生

翁因西北媼西南離坎遷來自互參少長一時咸速肖

入俱成七動成三

媼鳥皓切  
音與拘同

原位先天正北中西南一去萬源通洗天浴日歸滄海

到底無踰平土功

未論厚載合無疆一撮之多盡有當人不失當根一念

天冠地屨萬年康

屨九遇切  
音與據同

發散自來非獲已始終翕聚乃其常只司時物初秋令

便綰一元無盡藏

水木順來常逆克火金逆去順相生平持地緯為中轂  
六百三千盡受成

物宜何事推牛馬子母相隨牝順承人道若無含括意  
恐無尺土不峻嶒

誰向虛空立得身盡由方寸地為人人如不敢虧方寸  
六合何生不我娠

震三 九章

一索為男長莫先出三義在未三前以時出入皆依二

恐有歸藏意未傳

雷出人皆謂自東那知子半已靈霍不論發半復收半  
莫擬開天第一功

焦火凝水苦一生常愁晦塞未晶瑩只由人耳自堅塞  
造物何曾不大聲

雖雉未雷先有覺人生安得不知微時常淵默雷聲者  
動未占祥已吉幾

欲問雷聲何處起由來起處不容思動幾不自無方出

掣地轟天總不奇

錮蔽何由得復開一聲應道自天回聞聲莫向黔神會  
躊躇當前俱沔來

戰兢一脉古來傳真正英雄敢自便夜半人人有消息  
無如酣夢日安眠

天意由來重絕人震躬不及必於鄰欲將惕厲憂勤意  
散作千門萬戶春

先四今三以近遷為催旭日到中  
天動生明矣明生動

每旦東牕思爽然

巽四 九章

陽愆陰伏總為災三動應須四散來不獨清明司正令  
八俱從律曰時哉

母來遂出位東南此意誰知為長男但一動時隨一撓

要終何動可生慙

撓救教切音與  
關同援也屈也

不潔從初便已迷不齊更自墜塗泥天工付物令自入  
纔入微來便潔齊



雨暘寒燠具徵休每抱無端撓屈憂瞬息盡含消息理  
如何恒益不相求

聲從西北多愁慘解凍由來必自東古有虞皇稱妙手  
時時更轉入南宮

虎嘯何為頃刻生凡求同氣應同聲汎蘭轉蕙流芳聞  
安得人生無令名

恒言地不滿東南抑滿為聲義甚闡雷出不驚離化日  
一天膏雨更同甘

何者為幾近自微滿園春色縱芳菲即如萬點愁人處  
也屬生成造化機

四時默運為神道宇宙交流是太和噓古吸今惟一息  
莫教一息到偏頗

中五 九章

二三一四互相參生氣從中已滿函成即是生都此數  
原無一宅八為龕

欲將十數兩平分兩莫能推便盡分從一遞乘分至九

奇行方顯宅中君

降即是水升即火或左或右木金神居中不定為專氣  
奇偶分來作八純

不道從中推出去不從外轉將來纖毫置待推移力  
心目猶然挾未開

虛實俱從有主論虛何空寂實何痕只常喚得惺然在  
天地翻來也自存

奇數分奇歸正列偶分成偶以偏居兩端妙義依稀具

泥五為中義復踈

一疑未盡又求中中又何庸効八功即八即中無兩義  
用中不是八歸空

四隅為窟全圖坎四正為君全象離離坎之中即中五  
乾坤全力并于斯

九麗為陽一陷陰三生七斂五中妊更將四偶來參伍  
纔識平分造化心

乾六 九章

尊體何曾西北傾要從離九發天精况分艮出歸東北  
始始終終更有成

六以六乘三十六六十四義遂無餘始知後六即先一  
獨運周天為帝車

先一後六種一粒孚甲生來粒盡消一粒消成無限粒  
一原非乏六無饒

首出何緣又貴无凡爻有六盡乾符試占潛義原乾始  
到用從初便足虞

六用為坤那屬乾須知地外別無天天飛田見神不測  
定位由來自不遷

三六合來原是九六驚三震即乾乾人人乾體自不息  
只不能強便不圓

四以七終分地戶六原三始列天門天行全體要終始  
西北如何不宅尊

莫認偏居西北隅紫垣原屬帝尊樞幾人到此純無愧  
風虎雲龍在合符

為何倚蓋從旁轉時令須歸四正行獨抱嚴凝為戰主  
大生原自不生

兌七 九章

母顧前兮父後貞相看少女喜如嬰人心感到和平極  
恰恰嬰兒孩笑情

出三物物發生元入七都將肅殺論不到西成遂無實  
秋門那得異春門

戚戚真為迷自心若求極樂亦邪淫異流竊向西方去

梵夾流傳直到今

水瀦自地咸歸澤露湛從天莫戴恩知是神功歸不宰  
蒼蒼正色更何言

恒言口舌是凶場半語如非亦作狂朋友相求如澤麗  
不容聲處盡輝光

易戒何為示喪羊外柔內狠甚非祥體剛用順為貞說  
到處羣行寧有妨

木落泉枯華盡飲累累萬寶告秋成相逢講習緣何事



金不洪鑪永不精

先原屬火後成金誰物能移百鍊心但遇火來仍百鍊  
無言至說此中尋

澤水如何滙七西漫流到此盡歸隄自從與坎相還返  
一檐乾坤入手提

艮八九章

少男莫把少來看驚震翻身到此安豎立人寰作天柱  
橫空無不是龍盤

八七相反義不遷一周天運始終旋光明直上通巔頂  
不到全乾已號圓

徹底深淵徹頂山密重重是護天關凡思不出艮思位  
迅電驚雷不得間

初中兩索到三成動不能驚陷亦平人有此身俱泰岱  
如何東仆又西傾

役役營營莫肯休為無歸宿地堪求夜來深藉山靈力  
指我層層最上頭

尺寸從初不蹈空培塿無不到龍巖祇憂九仞垂成候  
還缺要終一簣功

橫看為嶺豎為峰山亦何曾有定蹤不指山中笑山外  
一源河洛盡來宗

始終萬物成為盛行止兼來又妙時若懼當門無定脚  
急回東北細尋思

百尺竿頭思進步即來絕頂未安身如知究九南歸意  
儘有工夫與日新

離九 九章

大明南面要終始東出西沈見量然明眼都無方滯礙  
時時應道是中天

驕陽燥性莫禁持東爐西流北涸之物物南方可相見  
化工知到極和時

世人多謂天明暗明暗由來不屬天求旦且知昏曉義  
人心何得遂茫然

五行生性俱偏發惟火尤為不易平從一深潛要到八

一星都是一天明

九在先天本太陽一如為首九何光須知離畫非中時  
无首羣龍盡此藏

燧皇作燧有深慈每為圖書秘玉匙新火四時無一改  
有生盡喚突焚屍

乾位由來以六成若論乾德盡離精和雲和雨同行施  
無日中天不大明

水中生物恒無盡曾不聞從火裏生為是有光都外發

不根內暗不成明

九於龜洛為離位原在龍圖屬坎宮始識流形雲雨後  
都歸終始大明功

隨吟六首

隨道唯時係亦膠丈夫功在出門交有如只作閉門事  
縱善難辭小子嘲

四方上下盡吾廬門內如何是定居係子係夫皆婦道  
兒男安得婦襟裾

及時婚媾稱嘉禮惟善為隨孚更嘉牛馬服乘寧憚遠  
為窮天地善無涯

下得柔來惟是剛更於晦處有深藏羴天一息根淵底  
湛露何由到隕霜

盡人能下為隨動淵默雷聲入息時王度自來惟正已  
但令人喜便成私

一日晨東暮必西自東有出入何齋會家天下人中國  
亨到西山始不迷

蠱吟六首

無人不有乾坤事  
巽艮尤司重擔因  
巽入艮成方是幹  
休將六甲問丁辛

艮荷全乾巽負坤  
蠱稱父母恐離根  
根深幹乃參天長  
到底難酬罔極恩

百病盡堪憂父母  
若淫惑疾更憂深  
湏知標治皆枝葉  
風必從東是幹心

平地無時不大川  
一絲惑溺況滔天  
二人為此煎成病



利涉如何勿直前

莫將子病稱親病  
親病由來盡子瘡  
三日後先都是甲  
回生起死在須臾

王侯事任有時卸  
子分終身無日寬  
身不自卑親更高  
高山矗矗到頭看

剝復吟

幾年剝復循環讀  
註脚盤旋總隔膚  
剝宅到安方碩果  
復闕無閉盡迷途  
朋來自不通商旅  
民載誰曾蔑足跣

爛義更教先入手反生直闢後天圖

井鼎吟

井鼎何緣並上身坎離南北媾姻親井無泥谷是除舊  
鼎到聰明為取新改邑有瓶皆足繡鉉金無實不稱珍  
細于水火求精義寸鬱涓流盡入神

屯蒙吟

屯雨蒙泉莫外求盡于心坎窺因由但聲便有一天潤  
纔應俱澄萬頃湫女子是貞終乃字金夫无瀆也回頭

馬班三轉成三順雨意泉情一樣流

需訟吟

無人不共此心天與坎為交盡大川需在血中應蚤出  
訟于淵底怎長眠三來客意無相負三禰人心亦自平  
得到終身是平水誰教天體有虧圓

次于元時論易四首

求明須用折豐肱正得還羞有或承太極一圈為父祖  
四千九十屬元曾肝腸盡顯方成象手足無交亦遜蠅

直向犧皇心地騁相磨何處不孚朋

漫于理窟索精微子夜聲來見活機共惜刪餘詩不作  
那知翼後易無揮一園羨爾窩中是百衲慙于漢上非  
得到洗心無事事只今三兩盡春沂

孤立無羣義不成一爻一應鳥鳴嚶解非澍兩安孚甲  
革用黃牛纔有庚旋幹乾坤為妙手正安離坎不心睛  
頻年摸去重門錮頃刻開來存震行

盡言良不足為書言到無言意有餘有健不粘乾是馬

入微却以巽為魚虛談浪說無庸象實種看來要力鋤  
爾我心期忘老至勝教空裏覓真如

先後卦圖雜吟

十二首

從先論後猶形影由後求先在逆掄下實上虛南北正  
左升右降坎離勻山雷轉處流增順風澤旋時麗更新  
欲得義圖真會面應於文序密潛神

日不干天為失麗水非歸地是空流天光有竅從離發  
地脉無涯遡坎求悟徹離來俱地載習知坎至盡天謀

但將坤坎立下脚定取乾離到上頭

八物相求數盡參震離纔得會三三是明必震應無察  
凡動俱離寧有或震為半聲來艮北離因全照到天南  
三三入手終要六每日東窻夢亦酣

一念何為分八貞義文恐亦自難名乾坤混開纔無我  
日月升沉始有明息息風雷函變化時時山澤定平成  
這般那是支離事略放寬鬆便固生

心象如何獨坎名人心多少陷難平但無密地終歸漏

纔未盈科總不行原始屯蒙深莫極要終渙節輿俱傾  
斯文千古茲常在四聖心傳誰與盟

文聖潛心盡伏羲試看序義更無為求端定自屯盈始  
要極應終未曳時不向坎中䟽地脉怎于離內透乾知  
分明先後如符合易簡工夫那有支

根窟相函有定論也應通變一翻掀掣天風入探何窟  
奮地雷來躡孰根畜密是乾皆姤遇豫冥無復不坤元  
往來閑得亦忙得著得閑忙恐弄魂

休將井邑妄疑猜泰上曾從告命來

泰初五兩爻變成井

初泥不

教窮底汨五泉怎得正中回大端氣質皆應變任有功  
能未足材若向此中求禔福便應脫換舊胚胎

屯女何為待十筭天行癸甲每相禔願終勿用緣誰拂  
復上无征祇自迷象在眼前呈妙義數於日用露天倪  
自從象數經揮斥明顯俱驅入晦谿

渙机何為必用奔水中那得是人村到如魚鱉方無問  
既具鬚眉怎許渾巨浪莫搖盤地石疾風只拔自樞根



淋漓上血終期出況有從初馬壯存

漸陸要終即是達陸于南北有分岐南來人世盡羅網  
北去雲霄在羽儀小子且知防寇患征夫那忍遂安危  
但令勿失于磐意任有狂風倒地吹

汜濟何為病未孤任令善涉尾終濡只從半武不真處  
便作終身大惑途靈變入神都是媚頭顱到白不成夫  
至人象示心綦苦無奈臨岐盡泣朱

先後卦圖雜吟 二十首

掘泉在西北西北翕靜方泉必自山出先後先函藏始  
雖涓涓微終成溟渤章泉源自湮塞桔槔頭白忙

知坎始知心知心亦知坎心地自到手性天誰復闍九  
見根一歸一以入元覽逆順先後間朝聞夕無歆

言意傳較淺象義示以深雖勿病言恐還虞受象瘡或  
欲專忘象空無禍又侵義文不可作迷罔至于今

人物莫非心何緣獨坎謔中光微一線外暗密千林子  
半已難識西原誰更尋有能醒陷義可免到頭陰

巽必乾離輔艮惟坤坎親但流俱有砥無照不成春出  
入東西戶轉旋南北身一隅微彳亍八義盡湮淪  
乾稱健者施施以實陰虛上施膏澤零下施和風噓中  
施遲日麗物物有陽舒所以巽兌離尊乾俱南畬  
坤稱順者受受以斂陽實上受蕪山止下受洊雷出中  
受習坎陷物物無陰恤所以震艮坎親坤俱北隲  
後離反先乾離乾不相奪乾陽但中虛離光遂外發虛  
自上下始巽兌交相窟全虛便成坤坤虛盡乾逆

後坎反先坤坎坤不相陵坤陰自內實坎精逐中凝實  
之徹上下艮震交相憑金實便成乾乾實俱坤興  
陰陽分兩端允執惟一理乾旋坤必轉坎降離自起巽  
艮一反身震兌東西倚兩化一故神分明用中旨

少壯兼六子男女惟一我老去兼翁嫗父母總亦汝乾  
坤兩岐稱藐焉謂中處仍恐一膜隔肝胆亦齟齬

嫗衣過切

乾坤為首腹坎離為耳目震巽足股隨艮兌手口掬俱  
吾一身物如何向外逐百姓病不知君子寧無惡

相見是午正難求在子中後乾仍有戰先艮未遑躬謂  
勞誰曾出云歸自故宮龜書湮塞後千古理長蒙

震惟動出端巽乃逆入始動出多透外逆入多向裏庸  
愚喜順呼明詰珍逆揆忽然夜半風妙悟等雷起

順往十一易逆來千百難往來皆震厲逆順盡隨官濟  
首應終沒屯桓必始盤祇憂到敦艮尚恐作闕觀

方知掛于八圓義章則九方必以圓行圓亦藉方守馬  
或繫其足龜故阮其首常編即三絕一隙曾何有

天根不易躡月窟慎所遇靜翁全體天動闢大始路思  
旨淵未發易數渺逆汴飄風久零亂驚雷但憊懼

形生神發後無竅不外漏閉關動成復貞柅靜亦始往

來重逆數婚媾戒匪寇蒙扁自不啟屯泣誰可救

聰明非二物坎離根互之昌謂聰不明坎陽自中樞聞

言不勝逆至道何由知雙瞳任炯炯只可喚盲兒

天意重絕人人心滋不忍夬羊牽以和遯牛執亦憇姤

喜首包魚解悲終射隼孔聖有微言諸儒毋域畛

欽定四庫全書

易學

三十一

易像鈔卷十八